



Umhverfis- orku- og loftslagsráðuneytið
Skuggasundi 1-3
101 Reykjavík

Reykjavík, 28. febrúar 2022

Efni: Umsögn Húsnæðis- og mannvirkjastofnunar um drög að reglugerð um öryggi leikvallatækja og leiksvæða og eftirlit með þeim

Húsnæðis- og mannvirkjastofnun (HMS) vísar til máls nr. 35/2022 sem birt er á samráðsgátt þar sem lögð eru drög að nýrri reglugerð um öryggi leikvallatækja og leiksvæða og eftirlit með þeim.

HMS gerir eftirfarandi athugasemdir við drögin.

Markaðseftirlit með leikvallatækjum

Í 2. gr. draganna er mælt fyrir um markaðseftirlit með leiktækjum. HMS bendir á að leiktæki eru leikföng og að eftirlit með markaðssetningu þeirra fari samkvæmt reglugerð nr. 944/2014 um öryggi leikfanga og markaðssetningu þeirra innan Evrópska efnahagssvæðisins. Því er lagt til að 3. mgr. 2. gr. falli brott úr drögum reglugerðarinnar.

Verði 3. mgr. 2. gr. draganna ekki felld brott bendir HMS á að málsgreinin vísar til brottfallinnar reglugerðar um öryggi leikfanga og hættulegar eftirlíkingar. Nú er í gildi reglugerð um öryggi leikfanga og markaðssetningu þeirra innan Evrópska efnahagssvæðisins og mælist HMS því til þess að tilvísun verði breytt til samræmis við það.

HMS fer með markaðseftirlit með leikvallatækjum samkvæmt 11. gr. núgildandi reglugerðar nr. 942/2002 um öryggi leikvallatækja og leiksvæða, með áorðnum breytingum. Ekki er gert ráð fyrir slíku ákvæði í drögum sem liggja fyrir á samráðsgátt. Standi vilji til þess að HMS fari áfram með eftirlit með leikvallatækjum er lagt til að mælt verði fyrir um það í drögum. Sérstaklega er vakin athygli á því að eftirlit HMS nær eingöngu til markaðssetningar á nýjum leikvallatækjum en ekki til eftirlits með öryggi þeirra eftir að þau eru tekin til notkunar.

Öryggi og aðgengi notenda

Í 9. gr. draganna er vísað til öryggis og aðgengis notenda við frágang á leikvallatækjum og annars búnaðar en ekki er sambærilegt ákvæði þar sem vísað er til umhverfis leiksvæða. HMS leggur til að bætt verði við 7. gr. draganna að við frágang leiksvæða, aðkomu og umhverfis skuli þess gætt, í samræmi við ákvæði byggingareglugerðar, að öryggi og aðgengi notenda verði sem best tryggt.

Virðingarfyllst
f.h. Húsnæðis- og mannvirkjastofnunar

Guðrún Lárusdóttir
Markaðseftirlit – sérfræðingur

Svava G. Ingimundardóttir
Markaðseftirlit – lögfræðingur